



Sulisunik avataaneersunik atorfinitsitsiniarnernut qinnuteqaatit kommunenit suliarineqartillugit, qinnuteqaatit kommuneni suliffissaqartitsiniarnermut ataatsimiititaliani pilersinneqartussani tusarniaassutigineqartalernissaat qulakkeerniarlugu Naalakkersuisut maleruagassioqqullugit Inatsisartuni IA-mit ilaasortaasunit siunnersuummut tunngatillugu nassuiaat.

Aggusti 2012

IMARISAI

| | |
|--|-----------|
| 1. Aallaqqaasiut..... | 03 |
| 2. Nassuiatip imarisai | 03 |
| 3. Tusarniaanermi illua'tungerisat inassutaat | 04 |

1. Aallaqqaasiut

Inatsisartuni Inuit Ataqatigiit ilaasortaannit siunnersuut imm. 57 UPA2012-imi Inatsisartut oqaluuseraa, sulisunik avataaneersunik atorfinitsitsiniarnermut qinnuteqaatinik imaluunniit suliaqartitsinernik suliamik isumaginninnermut atatillugu kommunit Suliffissaqartitsiniarnermut ataatsimiititalioqqusaanissaannik nassataqassaaq. Siunnersuutip siullermeernerani Naalackersuisut inassutigaat aappassanneernissaa UKA2012-imut kinguartinneqassasoq, immikkoortumullu nassuiaasiortoqassasoq.

2. Nassuiaat

Immikkoortortami inatsisunik atuuttuusunik allanngortitsinissamik siunnersuut nassataqarpoq. Taamaattumik naatsumik maannakkut inatsisitigut tunngavisoq uteqqinneqassaaq: Kommunini aqutsisoqarneq Inatsisartut inatsisaat nr. 22, 18. november 2010-meersukkut isumannaagavoq.

Inatsimmi qulaani pineqartumi kommunit IA-p siunnersuutaani kissaatigisaasutut ataatsimiititaliamik ataavartumik isumaginnissinnaasumik pilersitsinissaannut tunngavissiisoqarpoq. Tassaavoq inatsimmi § 26:

”§ 26. Kommunalbestyrelsi aammattaaq ataatsimiititalianik ataavartunik pilersitsinnaavoq, taakkualu katitigaanissaat suliassaallu aqutsinermut ileqqoreqqusami aalajangersarneqassaaq. *Imm. 2.* Ataatsimiititaliani ataavartuni ilaasortat kommunalbestyrelsimi ilaasortat akornanniit qinerneqartassapput aamma akunnattumik amerlassuseqassallutik, kommunalbestyrelsillu ilaasortaasa affaannit amerlanerusinnaanatik. Ataatsimiititaliani ataavartuni ilaasortanut tamanut sinniisussamik qinersisoqartassaaq, taakkualu ilaasortaasup najuussinnaannginnerani ataatsimiititaliami ataatsimeeqataasinnaanngorlugit ataatsimiigiaqquneqartassapput. *Imm. 3.* Ataatsimiititalianut ataavartunut ilaasortassanik qinersineq aningaasaqarnermut ataatsimiititaliamik qinersereernerup kingorna ingerlanneqartassaaq. Qinigaaneq kommunalbestyrelsip piffissamut qinigaaffianut atuuppoq.”

Taamatut tunngavissiinikkut kommunit maannakkut ataatsimiititaliat tullianiittut, nunap avataanit sulisut pillugit isumaginnittartut pilersissimavaat:

- o Qaasuitsup Kommunia:
Inuussutissarsiornermut, Aatsitassaqarnermut Takornariaqarnermullu Ataatsimiititaliaq
- o Qeqqata Kommunia:
Inuussutissarsiornermut Suliffeqarnermullu Ataatsimiititaliaq
- o Kommuneqarfik Sermersooq:
Atugarissaarnermut Suliffeqarfimmullu Ataatsimiititaq
- o Kommune Kujalleq:
Inuussutissarsiornermut Suliffeqarnermullu Ataatsimiititaliaq

Ataatsimiititaliat taakku kommunalbestyrelsini ilaasortanit inuttaqarput.

Kommunalbestyrelsi aamma Inatsisartut inatsisaat nr. 22, 18. november 2010-meersumi § 31, imm. 3 najoqqutaralugu makkuninnga periarfissaqarpoq:

”§ 31. Ataatsimiititalianut, isumalioqatigiissitanut, siulersuisunut taamaaqataannullu kommunalbestyrelsip aalajangersakkat allat naapertorlugit sinniisoqarfigisassanut ilaasortassat kommunalbestyrelsip qinissavai.

Imm. 2. Ataatsimiititalianut il.il. ilaasortassanik qinersineq ataatsimiititalianut ataavartunut qinersinerup kingorna ingerlanneqartassaaq. Qinersineq piffissamut kommunalbestyrelsip qinigaaffianut atuutissaaq.

Imm. 3. Aammattaaq kommunalbestyrelsi ataatsimiititalianik immikkut ittunik pilersitsisinnaavoq suliassat aalajangersimasut isumagineqarnissaannut imaluunniit kommunalbestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartussanik. Kommunalbestyrelsip aalajangissavai ataatsimiititaliat immikkut ittut katitigaanissaat taakkulu sulinissaat pillugit maleruagassat aalajangersassallugit.

Imm. 4. Kommunalbestyrelsi aalajangersinnaavoq kommunalbestyrelsimut ilaasortaangitsunik toqqaassalluni tamanna inatsimmi allami immikkut ittumik periarfissatut akuerineqarsimappat, aammalu suliassat allat kommunalbestyrelsip akuersineratigut suliareqquneqartut.”

Taamaalillutik Inatsisartut inatsisaat nr. 27, 30. oktober 1992-imeersoq najoqqutaralugu nunap avataanit sulisunik atorfinitsitsinissamut imaluunniit suliqartitsinissamut akuersissuteqarnissamik qinnuteqaatit sularineranni ataatsimiititaliamut, aningaasaqarnermut ataatsimiititaliamut aamma kommunalbestyrelsimut ikorfartuisussamik avataanit ilaasortalimmik immikkut ittumik kommunalbestyrelsit ataatsimiititaliornissaannut Inatsisartut aamma/imaluunniit Naalackersuisut inassuteqarsinnaapput.

Tusarniaaneq

Nassuiaat Aningaasaqarnermut Naalackersuisoqarfimmi, Nunamut namminerumut, Pinngortitamut Avatangiisinullu Naalackersuisoqarfimmi, KANUKOKA-mi, kommunini, SIK-mi NUSUKA-milu tusarniaassutaasimavoq.

Tusarniaanermut akissutit Kommune Kujallermit, Kommuneqarfik Sermersuumit aamma SIK-mit takkupput.

Nunap avataaneersunik sulisunik atorfinitsitsiniarnermut imaluunniit suliqartitsinerumut qinnuteqaanik suliqarnermut atatillugu immikkut ittumik Suliffissaqartitsiniarnermut Ataatsimiititaliornissamik siunnersuut kommunip tapersorsinnaangikkaa Kommuneqarfik Sermersuup nalunaarutigaa. Maannakkut ataatsimiititaliaqarnerup iluserisaani immikkoortortamik aqutsisoqarneq pioreersoq tamakkiisumik isumannaassuseqartumik pineranik tamanna tunngavilerneqarpoq. Taamatutaaq kommunimi politikerinut suli nukinginnarluinnarnerusunik suliassaartoq kommune isumaqarpoq, taamaalillunilu siunnersuut najoqqutaralugu immikkut ittumik ataatsimiititaliorniarneq politikerit piffissarisaannik pitsaanngitsumik pingaarnersiuisoqassalluni. Naggasiutigalugu kommunit iluminni politikikkut aqqissuussinerannut Namminersorlutik Oqartussat immikkut ittumik inatsisiliornikkut, aammalu kommunit aqutsinerumut inatsisaat avaqqullugu akulerunniarnerat kommunip akuerisinnaanagu Kommuneqarfik Sermersuup erseqqissaatigaa.

Taamatutaaq Kommune Kujalliup siunnersuut itigartippaa, ullumikkut kommunit tamanna pisariaqartillugu missiliuutigissappassuk immikkut ittunik ataatsimiititaliortoqarsinnaareersoq innersuutigalugu. Avataaneersunik sulisunik qinnuteqaatinik isumaginninnissamik suliassap isumaginissaanut immikkut ataatsimiititalioqqinnissamik pisariaqartitsisoqanngitsoq Kommune Kujalleq isumaqarpoq. Kommune Kujallermit suliassaq Inuussutissarsiornermut Suliffeqarnermullu

Ataatsimiititaliap ataaniippoq, ataatsimiititalioqqittoqassappallu allaffissornermi tamanna annertunerusumik suliassseqqiiginnassaaq.

Qulaani pineqartut ataatsimiititaliap makkuninnga ilaasortaqaarnissaata SIK-p kissaatigiuarsimagaa SIK tusarniaanermut akissummini nalunaarutigaa: Kommunimit sinniisuutitat, SIK-mi najugaqarfimmi immikkoortortaqaarfianit sinniisoq, Kalaallit Nunaanni Sulisitsisut Kattuffiata najugaqarfimmi immikkoortortaqaarfianit sinniisoq, kiisalu illoqarfimmi suliffissuaqassappata Royal Greenlandimit sinniisuutitaasinnaasoq. Ataatsimiititaliaq taakkuninnga ilaasortaqaartinneqassappat najugaqavissutut sulisartuusut suliffeqarfissatut neqerooruteqarfiginissaasa isumannaarnissaat SIK-p qularutiginnilaa.